

IFIQK EMI OTODE N̄WED JOB

Job 14:1-22; 19:23-27; 21:1-34; 31:23-40

QYQHỌ UKPEP-N̄KPỌ 373

Eke Mkparawa

IKỌ IBUOT: “Ami mmọfiok nte ke Andifak mi odu uwem; ndien ke akpatre Enye eyedaha ada ke ntan isọñ” (Job 19:25).

Abasi, Andinọ

Job ekedi akwa owo emi okodude uwem ke ata ediwak isua emi ekebede. Enye ama enyene inyene eti-eti onyũ okpono Abasi nte Andinọ inyene oro. Edi ke ini inyene Job ye nditọ esie etakde, enye okosuk ananam nkpo ọno Abasi. Mbuotidem esie okokoro ke nsinsi Abasi, ndien enye ama ofiok ete ke akpatre, Abasi eyenam kpukpru nkpo efon.

Nte Uwem Edide Ibio-ibio

Job ikadaha nte ke edi imọ ikpoñ ke ererimbot ikokut ukut. Enye okodoro ete: “Owo eke nwan amande omuhọ usen, onyũ oyuhọ ukut: Owo asiaha nte ikon, ndien esibe enye efep, enye efehe ebe nte ukpoñ, inyũ ibighike” (Job 14:1, 2). Nnyin imọfiok ite ke edi Abasi akanam etiñ mme ikọ oro, koro Peter, owo mbet ama osoro etiñ ukem nkpo oro ke ediwak isua ema ekebe; “koro, ofuri obukidem etie nte mbiet, ofuri ubon esie onyũ ebiet ediye ikon-ikot; Mbiet amasat, ediye ikon onyũ okibe” (1 Peter 1:24). Edidem David nko emi ekedide owo inyene okonyũ enyenede kpukpru nkpo ke ererimbot emi nte okponode owo kiet ekededi uyuhọ ama ofiok nko nte uwem emi midighe nkpo ndomo kiet. Enye okodoro ete: “Afo omonim usen mi nte ekaubok; eyo mi idighe baba nkpo kiet ke iso fo” (Psalm 39:5).

Mme owo ekpedodu uwem esim isua anañ, “ndien iseri mmọ edi okposon utom ye ukut: koro enye (isua) awarade ndibe, ndien nnyin idañ” (Psalm 90:10). Uwem ererimbot emi okpofon nte ofofon, inohọ owo uyuhọ. Yak mme ubuene ekufube mbon inyene ufup ete ke edieke mmọ ekpenyenede okuk ye ifure uwem ke mmọ ekpekop inemesit. Ata inemesit enyene owo emi ayakde esit esie ofuri-ofuri ọno Abasi. Ubuene emi ayakde ima Abasi oyohọ oduhọ ke esit esie okop inemesit ukem-ukem nte anditiene-Christ emi enyenede inyene, onyũ okop inemesit akan owo inyene emi edide anam-idiok. Job ikabatke uwem esie nte nkpo. Edieke omuhode nsinam afinade abañ? Uwem emi edidude ke mkpa ama ebe edi enye emi edibighide ke nsinsi, oro edi se ikponde ikan.

Ntan Ke Ntan

Job ama etiñ abañ nte mkpa ikpohidem nnyin edide akpatre nkpo. Edieke esibede eto, mbufa nkok ekeme nditibe ke etak oro. Edi ema ebuk owo ke udi, okpo oro ikemeke ndikori aba. Enye ifiokke nkpo baba kiet ibañ akwa usoro edibuk emi enamde, flawa emi edoride ke udi, mme ukpono emi mme ufan ye mbon ima esie enode ke nditi enye. Enye akpa. Uwem emi enye okodude ke ison ebe, ndien nkpo baba kiet emi owo anamde ọno enye ikemeke ndikpuhore idaha esie ke iso Akwa Ebierikpe. Nte enye akakpade kpa ntre ke enye edida ke iso Abasi ke nsinsi ini.

Ikpohidem afiak ke ntan, edi Spirit aka iso odu uwem, afiak etiene “Abasi emi okonode” (Ecclesiastes 12:7). Okposuk edi nte edide ntre, emi idighe utit uwem nnyin.

Job ama obup mbume, “ke owo akpade, nte enye ediset?” (Job 14:14). Mme owo ke emana ke emana ema ekere nkpo ebañ mbume oro. Owo ikemeke nditiñ ndutuhọ ye mfuhọ emi osimde mmọ emi mikenyeneke idorenyin nsinsi uwem ke ini mmọ ebukde mbon ima mmọ! Mme owo emi ekedude uwem mmọ esio Abasi efep inyeneke idorenyin ke mkpa edide. Kpukpru inyene, ukpono ye etop iworo ke nkpo ke uwem okurede.

Eriset Mme Akpa-mkpa

Nti mme anditiene-Christ, kpa nte Job, ebuot idem ke eriset mme akpa-mkpa ke akpatre usen oro Jesus edifiakde idi, ndien “mmọ emi ekpañade ke Christ eyebem iso eset: ndien eyemen nnyin emi idude uwem, emi isuhode, edok ye mmọ ke ikpa-enyon, man isobo ye Qbon ke enyon: ntem ke nnyin ididu ye Qbon ke nsinsi-nsinsi” (1 Nwed Thessalonica 4:16, 17). Job ama oyuhọ ke ndibet tutu edikpuhore oro ada itie. Ndusuk Job

okodu uwem ke ñkpọ nte isua 3,500 emi ekebede ndien ke ini enye akakpade Spirit esie ama ọnyoñ etiene Abasi emi ọkọnọde enye, edi ikpọhidem esie ke osuk ebet erikpuhọre oro.

Ata mme andinim ke akpanikọ ke kpukpru emana ebọbọ ediana ọtọ kiet ke idorenyin eriset ke mkpa. Paul, owo mbet ama ewet: “Edi nnyin imaha mbufo enana ifiok, nditọ-ete, ebaña mmọ emi edede, (ekpañade) mbak mbufo edifuhọ, kpa nte mmọ eken eke minyeneke idorenyin. Koro edieke nnyin inimde ke akpanikọ ite Jesus ama akpa onyūñ ọtọñọ ntak eset, imonim kpa ntre ite, Abasi eyeda mmọ emi edede ke Jesus edi” (1 Thessalonica 4:13, 14).

Paul, owo mbet ama ebeñe idem ndibọ ukut ekededi man enye osim akpa eriset oro. Ekeme ndidi enye ikenyeneke mme mbufut nte Job, edi enye ama ọbọ ufen ke ata anyan ini. Ema emia enye ke ikpa utim ikotion, enyūñ eda mme ukwak emia enye utim ikata; ubom esie ama osip, etoñọ enye ke itiat; mme inọ, mmọ emi minimke ke akpanikọ, mbon obio esie ye nditọ-ete abiaña edighe enye uwem, enye ama okop biọñ ye tuep. Edi ke kpukpru oro enye ama ekeme nditiñ ete “mbat nte ndutuhọ eke ikutde idahemi idighe se idotde ndida ndomo ye uboñ eke ediyararede ke idem nnyin” (Ñwed Mbon Rome 8:18).

Edidem Ndidem

Job ama ọfiok ke imọ imoyom **Andifak**, Enye emi akanyañade ukpọñ esie. Jesus ikedighe kaña ke ererimbot ndikpa nte Eyen-erọñ Abasi, edi mbuotidem Job ama ọfiok ete Enye eyedi. Enye ama ọdọhọ ete: “Ami mmọfiok nte ke Andifak mi odu uwem; ndien ke akpatre enye eyedaha ada ke ntan isoñ” (Job 19:25). Job ama ese ebe ini emi Jesus edidide nte nsek-eyen ke Bethlehem, ndiduñ ye mme owo, ndibọ ufen nnyūñ mkpa, nnyūñ mfiak nset. Enye ama ekeme ndikut usen emi Jesus edidide nte Edidem ndidem ye Ọbọñ mme mbọñ ndikara ererimbot. Ikpọhidem Job eyeset ọwọrọ ke udi ke akpa eriset, onyūñ afiak edi ye Jesus ke ini Enye edidide ye “ata ediwak ndisana ikot Esie edi, Ndikpe ikpe ye kpukpru owo” (Jude 14,15).

Mbuotidem Abraham

Mme owo ekekere ete ke Job ye Abraham ekedu uwem ukem-ukem ini. Abraham ekenyene ukem mbuotidem emi Job ekenyenede. Enye ekedi owo inyene kpa nte ekebatde inyene ke ini oro, edi enye okodu ke isoñ nte oduduñ, oduñ ke mme ufok-ọfọñ. Enye ama ọfiok ete ke uwem esie mi eyesọp okure, ndien enye ekebeñe idem ebet nsinsi uwem, “obio eke enyenede nsọñọ-nda eke Andibọp ye Andinam enye edi Abasi” (Mme Hebrew 11:9, 10). Oro ekenyene ndidi obufa Jerusalem, emi kpukpru nnyin ikemede ndiduñ ke nsinsi-nsinsi edieke nnyin inamde esit nnyin ọfọñ idahemi man idot ndidu ke akpa eriset.

Kpukpru ukut ke ererimbot emi eyetre ke ini Jesus editoñode ntak edi. Enye ọfiok esit kpukpru owo, eyenyūñ ọnọ enye utip etiene usuñ nte enye okodude uwem ke ererimbot emi. Okposuk edi nte mme anam-idiok eforode ke ndinyene ediwak inyene ye ukpono ke uwem emi ñkan edinen owo, edieke mmọ mituaha mkpọfiok ke idiok-ñkpọ, mmọ eyebọ ndot-ndot ufen ye nsinsi ubierikpe ke akpatre. Job eketiñ ete ke ini ñkpọ ọfonde ye mme anam-idiok mmọ ekeme ndidọhọ Abasi ete, “Nyọñ kpọñ nnyin: nnyin inyūñ imaha ifiok usuñ fo. Abasi Ibom edi nso, eke nnyin ikpenamde ñkpọ inọ enye? Inyūñ ikut nso udori ke nnyin ikpede enye ubok?” (Job 21:14, 15). Edi Abasi ke esese kpukpru, ndien “Enyin esie eyekut nsobo esie, enye eyenyūñ ọñwọñ iyaresit Abasi Ibom” (Job 21:20).

Okposuk edi nte eti ye idiok ebuhode ke udi, owo ikemeke nditiñ mbaña utibe ukpuhọre emi edidude ke ini mme owo ke ofuri emana edidade ke iso itie ikpe! “Ekuyik ñkpọ emi, koro ini ke edi eke kpukpru mme andidu ke udi edikopde enye uyo eñwọñọ edi; mmọ emi ekenamde se ifonde eyewọñọ eduk ke eriset Uwem, mmọ emi ekenamde se idiokde eyenyūñ ewọñọ eduk ke eriset ikpe” (John 5:28, 29).

Job ama efehe ubierikpe Abasi ama onyūñ oyom nte Uwem esie ekpenemde Abasi esit. Enye asiak ndusuk ñkpọ emi ekpeyatde Abasi esit: Edieke Job ekpekedarade ke inyene esie inyūñ inọhọ Abasi uboñ ke mmọ edieke enye ekpekesuñide mme asua esie; edieke enye ekpekekutde owo emi oyomde uñwam ndien etre ndiñwam enye; edieke enye akanamde se idiokde onyūñ odomo ndidip utu ke ndiyarade. Job ikoyomke ndidue ke baba mme ñkpọ emi kiet.

Ana nte nnyin iti ite ke kpukpru se inamde eyewọrọ ada ke nsinsi ini. Abasi ke odomo mme edinam nnyin. Enye ọfiok idem mme ekikere ye mme udọñ esit nnyin. Nnyin ikpekam iboñ akam ye Moses: “Nam nnyin ifiok ndibat usen nnyin ntem, man nnyin ida esit ifiok idi” (Psalm 90:12).

MME MBUME

- 1 Anie akanam Job enyene inyene?
- 2 Nso ikedi ndusuk ukut Job?
- 3 Nso ke Job eketiñ abañã ikpòhidem, ke ema ebuk enye?
- 4 Inam didie ifiòk ite ke Job ama onim Ntañ-ndòk Ufòk-Abasi ke akpanikò?
- 5 Men ini uwem mi domo ye nsinsi ini.
- 6 Nso itibe inò ikpòhidem ke ini ebukde enye? Nso itibe inò Spirit owo?
- 7 Anie edida ke iso Abasi ndibò ubierikpe?
- 8 Nso iditibe inò nti owo? Inò mme idiòk owo?